



黔草卷十三目錄

檄文

討逆酋楊應龍檄文

誓師文

禱神伐叛青詞

與宣慰安疆臣等盟文

馮牙文

告玄帝文

告武廟文

告火神文

告五顯文

告關王文

告諸葛武侯文

告黑神南將軍文

告烏江神文

祭陣亡將士文

播平謝諸神文

播平謝關王文



播平追薦陣亡孤魂疏語

祭李夫人文

祭李封君文

祭江太夫人文

祭許淑人文

入黔祭吳楚黔中水陸神文

入黔告祖廟文

祭楊義叔觀察文

征皮林誓師禡牙文

征皮林告關廟文

五日謝雨文

偏橋開河告河伯文

祭楊憲副龍河年丈文

開塩井告山川祭文

祭鍾礪山方伯年丈文

祭大學士趙文懿公老師文

祭母舅公劉柳州文

祭李仁字都督文

祭來瞿唐太史

開黃平古磔河告水神文

祭王侍郎見峯年伯文

祭趙寧字尚書文

祭夏仁吾侍郎年兄文

乙巳征苗禡牙文

告關廟文

祭曾禹門孝廉文

祭楊泰巖憲副文

鑄錢告鑪神文

之穢簡策試觀大倫之數已犯首惡之誅其罪一也惟辟
作福惟辟作威人臣無將將則必誅而宦官宮妾之奉僭
擬 宮闈總管統制之除大亂 國法稱已曰朕稱子曰
新主稱女曰主主譙縱劉闢合為一人丹浦綠林結為一
黨其罪二也五司七姓莫非 王民小有齟齬遂肆魚肉
避難遠竄者追而炮烙之銜冤赴 奏者捕而支磔之填
穉孩於萬仞之壑聚母女為一堂之驩甚至剗孕婦而嬰
呱丸枯骨以犬飼疇非人類惟此荼毒其罪三也自十四
年以來謀動干戈焚劫屯堡纔可接腋於井蛙遽思持頤
於海鼈問罪之師方營白石拒敵之寇反殺官軍由茲倖

勝驕彼雄心其罪四也逆節之獄未正其罪征倭之調適
墮其姦一脫幽犴竟成漏網 聖朝念先世之勛督府開
自新之路示之五事藐若秋毫連年之逋賦不輸四萬之
罰鍰烏有徵調不赴驕悍愈滋其罪五也放豚躡躅歸虎
咆哮邊民怨之入骨官司聞而咋舌屯師飛練拯民湯火
風雲未陣蛟豕突至將帥不保其首領士卒盡膏乎甲兵
流血成河積屍徧野延燒百里之內絕無寸草之遺其罪
六也碁江城郭創自 朝廷群孽併攻一旦不守破獄劫
庫聲勢滔天殺將衄兵肝腦塗地闐闐市民盡作莫敖之
鬼縉紳巨室旋為羊舌之宗逆 天不道與 國為讐其

罪七也急於要撫巧於弄兵率九股之生苗連數萬之勁卒東坡橫截六衛震驚掠商販以資糧斷佛像而為曰千里孔道兩月不通其罪八也逆黨趙仕登者騁其螳螂之臂蠶害思石之地 天心厭亂兇人授首鼠子挾雙言而報怨龍泉被創而罹既土司何寃奔無噍類其罪九也燹鑊之魚期在消爛葦苕之鳥勢且摧折春秋之法亂賊必誅不思囚繫而祈生尚懷微倖以免死投賄而姦人盡縛挾撫而詭使就擒罪惡彌彰 朝野共憤其罪十也有一於此未或不亡况鴟性已受於胎生之始狼行益恣於稔惡之餘曠古無之終今何極即身齏粉不足雪數十萬人

之寃縱草薶禽鬼難以償二百司堡之命神人之所共憤天地之所不原且賊亡有期咎徵恒見祖塋碑哭知廟鬼以何依海國山崩覺地靈之盡竭可為短氣良足長吁本院奉 天討而挈義旗順人心而鋤妖孽材官雲集猛士星馳赳赳皆蒙輪挾輶之夫桓桓亦拔距投石之士以此赴敵何敵不摧以此圖酋何酋不得斯蓋丈夫食肉之秋壯士封侯之會冰有可折時不再來宜舉正正之旗百道並進圖堂堂之陣萬弩俱飛使董卓之魂先為東市之燼元濟之惡難逃雪夜之擒功名與日月齊輝爵賞將山河共永指白日以揚麾對 蒼天而布檄凡諸漢土咸使聞

知

誓師文

漢武伐夜郎多邑蜀校尉之力諸葛擒孟獲實濟火軍旅
之資黔陽故典尚存青史勛名猶烈我 皇朝子毓萬國
賓服四夷島奴啓釁於朝鮮懾天威而遠遁劉勃弄兵於
寧夏望漢幟以就擒惟茲逆首楊應龍者素藏禍心敢犯
天憲喜則人怒則獸睚眦之隙不忘稱爾戈挈爾矛饕餮
之兇遂恣殺戮無分善惡侵軼且實城池數百里內青草
不生十餘年來白骨盈墓數其罪不容於死正其惡自絕
於天 皇上嚴必勦之令授決勝之符天地合謀鬼神助

伐大師槩集問罪有期 天日以揚麾對神明而律誓是
我文武將吏以及漢土官兵為 王朝之臣子則不共戴
天之讐討小醜之姦雄則當奮從王之義感激宜雄將有
淚叱咤應怒髮衝冠震若雷霆方為烈士捷如虎豹斯稱
壯夫故或卷甲晨趨或潛師夜起或縱金鉦而入其阻或
橫玉弩以挫其鋒或折其拒敵之雄心或截其歸國之要
路必呂嘉之首是馘而劉闢之庭盡犁京觀築於遐方組
練收於外府庶上足紓 朝廷之念下可洗邊圉之寃建
茲大功自膺懋賞 明旨皎焉如日神亦陰為擁佑若督
撫鎮道及副叅遊守府縣衛所大小文武等官有貌似驍

熊志懷首鼠口譚忠義未堅鐵石之心念切身家尚絃帷
牆之見不思投醪饗士而剝削無厭未能超距賣勇而踞
踏自弛迎敵鼓行惟倚前茅當陣却步未誅獨柳姑忌勝
則籌畫每相矛盾涇渭清則是非不辨玉石或以小忿而
亂大謀或挾私心而害公義或首尾不相接應或秦越不
為助援或分地而止守疆域或違約而不顧孤懸土司懷
狐兔之悲而旅進旅退漢人造妻非之誣謗而如鬼如域而
且貪貨負於破賊之初淫妻女於埽穴之日爭功則按劍
相視邀賞則鼓譟而呼有一於此在國為不忠在家為不
孝在將為不武在士為不律無獨難逃 朝廷之斧鉞抑

且大犯神明之網羅赫赫在上其亟殛之

禱神伐叛青詞

伏以天討有罪大振貔虎之威神聽無私詎忍豕蛇之毒
聲靈赫濯幽顯皈依竊惟播毒楊應龍者隼質難馴狼心
自野馮險負固罔知三面之恩挾黨蓄謀益肆九頭之暴
徒動諭蜀無改吠堯弒父殺妻棄大倫於埽地割胎斷骨
稔極惡於滔天懷忿七姓五司度劉殆盡拒討白石飛練
傾覆靡遺加以綦江之屠兼之龍泉之陷前後戮無辜者
數十萬命終始恬不悛者幾二十年日月其愒神人胥憤
九重未安於丙枕三藩徒整乎甲兵惟 上帝顧謫之命

浸隆垂下民生成之德至厚五丁開道陰符彰殺伐之天
威六甲呈祥神武收蕩平之偉烈驅忠魂而愬闕下盡
令守虎豹之關拔厲鬼而護軍前罔俾滯黠之野庶鋒
鏑之腥盡洗而瘡痍之肉復完 宗社蒙休官民頌德謹
詞

與宣慰安疆臣等盟文

竊聞諸葛公之擒孟獲也當時所仗者火濟侯景之不得
志於高涼也南海所倚者沈氏閩閩中豈無頗牧檠戟外
便是良平自古定大難者率由茲道非一手足一耳目之
為烈也播酋揚應龍者席三苗之遺種煽九頭之餘孽包

藏禍心跳梁并幹公連異類欲悖太陽昔日年殺官兵於白
石今年殺官兵於飛練至於綦江之陷益肆滔天之惡犯
天下之大戒此人情之必誅 帝赫斯怒授鉞專征本院

銜命入黔泣劍共憤嘗膽同苦看得貴州宣慰司宣慰

使安疆臣本火濟之胄而母淑人鳳氏亦沈氏之儔世篤

忠順富貴精銳又有宗目漢把陳恩王嘉猷等為之左右

尚念爾祖助順討逆蠢茲播酋自干天討如能戮力掃

穴悉心為國剖貪恠之豕心獻突梯之鼠首本院合奏

朝廷申明前旨褒汝元功懋膺上賞今舉大事須當軟

血上告皇天后土下告山川神祇如疆臣與陳恩王嘉

猷等陽為聽命陰故敗謀以誤本院負 朝廷詒笑天下
 則不忠在疆臣等有如此血如疆臣等功成之日本院頓
 改初心不為 題請則不忠在本院亦有如此血惟神正
 直鑒此血誠有不如約者其亟殛之謹告

告文

馮牙文

大明萬曆二十八年歲在庚子二月乙亥朔越十有二日
 丙戌貴州巡撫郭子章謹以牲醴昭告于 旗纛之神曰
 稷稷生靈共戴 聖主百蠻率服萬方接堵惟是逆播揚
 應龍者性自豺狼兇猶猘猱構孽稱亂屠戮邊圉侵城殺

將上干天怒爰授節鉞征茲不軌猛將如雲戰士如虎烈
 烈高牙闐闐伐鼓燭吉啓行馮於征所正直為神忠勇是
 扈萬靈司戟五將擁部鏃刃鋒鏑集于亂賊鎧甲千楯完
 于軍旅早馘渠魁盡縛妖豎靈毒一麾皇風四煦以綏南
 黔以薦聖祐凱旆旋旌丕昭神武

告玄帝文

兩儀有政四海有君逆首不道大負國恩 帝命九伐爰
 整三軍誡言誓衆特薦苾芬龜蛇耀日貔虎成雲有征無
 戰偃武佑文黔國惟寧玄德彌尊

告武廟文

惟靈始畫六韜寔肇九伐以遏亂畧以救民社逆播煽毒
萬靈顛越天討有罪授我節鉞卜吉陳師誓掃兔窟千
羽風舉旌旄電發徽靈能罷滅此蠱蠹赫赫休光齊明日
月

告火神文

天生五材火德為崇陶鑄戎器以戒不恭蠢茲逆播梟鱓
同兇肅將天討敢告祝融畢方煽揚助我火攻疾如迅
電歛若颺風烽煙旋淨永燁神功

告五顯文

狡酋逆天構釁梅亂國有明罰孽未可逭五靈司土助

順伐叛蠲言誓師惟神幽贊將集頗牧兵合夷漢一鼓鯨
縛母俾鼠竄焚煬蕩沃萬姓安瀾赫赫大帝光靈永燦

告關王文

逆播桀虐義辜亭毒天討有罪師出以律霜戈成林玄
甲耀日將陳蛇陣旋掃兔窟雄戟一揮凜如破竹願言神
武顯茲大戮

告諸葛武侯文

惟靈昔伐南蠻威震古黔百代尸祝天威如臨胡播陋孽
震燄不禁帝赫斯怒命我徂征洎吉告期徼福羽林廣
開八陣潛授七擒早封京觀永奠生靈

告黑神南將軍文

惟靈像圖凌閣神遊鬼方既淫福善殿厥遐邦狡首匪燕
敢越天常奉 命徂征蠲吉啓行崇牙蔽野義鋒凝霜顯
戮巨憝汎掃櫓槍神其羽之大慰民望

告烏江神文

惟神上應天漢下截夜郎逆首不諫 天討用彰消吉渡
關方舟以航冰不必合沙不必囊凌陽無波長鯨是創聿
昭水德綏此蠻鄉

祭陣亡將士文

爾等斬關先登效順討逆臨敵血戰竟賞鋒鏑功雖未就

情則足惜旅魂悠悠爰聲唧唧遣官戒奠河流嗚咽早縛
渠魁用慰義鬼

播平謝諸神文

頃誓三軍討茲大逆賊勢方張神威有赫潛致其氣陰禱
其魄統緒費勇狐鼠就誠漢斬呂嘉蜀擒孟獲克匪三年
凱奏六月地關草萊吐恬社席積慶酬恩永戢矛戟

播平謝關王文

夜即不虞奉 命徂征鷹武維揚燕巢遂傾千年通寇一
朝犁庭餘孽盡掃京觀乃成棘門奏凱祥江洗兵七姓復
業八番更生天日所照永戢光靈

播平追薦陣亡孤魂疏語

伏以聖心救苦私宣不二之法門談口修因顯化大千之
世界恒河不沸震旦迴春顧此夷風寔迷佛日皇天厭亂
奮除滌孽於牂牁大德好生忍墜冤魂於草莽十年荼毒
萬劫塵蒙或被戮於大羊起霧之秋或犯難於梟獍屠城
之日或橫戈擐甲而勇以捐軀或輓粟飛芻而苦且賣命
積屍盈野去年之東坡飛練可哀流血成川今歲之烏江
龍泉尤慘橫殺及入山之婦酷害見投谷之孩兼以二豎
為殃不翅三途受苦往往叫冤叫屈大乎尚忍言哉哉哉
無倚無依誰則為之主者真西南未有之變寔是天地莫大

之悲匪籍慈航曷離苦海啓天人之大會拔苦惱之衆生
燈點金蓮輝一天之星斗香焚寶篆騰五色之雲烟散錢
給東市之魂施食飽莫教之鬼有緣皆度無劫不銷伏願
光徹九原恩覃六道大捨慈悲願俾種種滯魄蚤登快樂
之鄉廣開方便門庶啾啾餓鬼旋出輪迴之地布陽春於
幽谷灑甘露於冥程功德無邊漢夷有造

祭李夫人文

扶輿淑氣盤礴三輔豈應名世寔毓文士表靈清漢燦英
玄圃禮訓不騫德音孔臚弘美慶宗韓政是危陰範圖書
壺馨蘭杜馬倫齊躅德曜婉軌司馬矯翰天遠振武清要

陟華臬蕃侈譽建牙遼海威震索虜晉秩夏卿望赫吉甫
夫人承之左翼右羽 帝命褒嘉昭茲敬姜翟軒葱珮錫
耀無疆司馬再起征彼夜郎擁傳入蜀相與頡頏外宣九
伐內塵七襄瑰猷徽行鳩淑麟祥輿頌偕息令問彌昌詎
知金母招游帝鄉吉路永辭仙都翱翔色黯玉壘沔咽錦
江懿惟內美彤管留香博夜晦矣不晦者長童侍司馬昔
在建康茲領豹畧已黔接壤又聞獻響稔下懿筐赴問遙
傳五內如創教戒繁多龔龔奠靈床歆馬來格環珮鏘鏘

祭李封君文

嗚呼滌旋源於柱下兮襲玄足而慮久餘豈神明之芳胄兮

顯淑氣於扶輿昂容岍之德德兮酣道德而遠遠洵玉質
而金相兮埒周益與魯瑛入倫籍以獎勸兮謠俗軌乎盱
睢延長風之不借兮肆川觀而嚴居曷司馬以大業兮負
名世之偉器矯鵬翮於天達于斐鴻聲於 朝者丞髦士
於齊梁兮儼歐冶之鑪錘牙韋建乎遼海兮長城壯於鼻
鼻醜虜不敢南牧兮紫塞為之熄燧維夜郎之反側兮簡
文武之感備起司馬於東山兮肩西南之重寄挈虎豹而
登壇兮掃機槍之妖孽計元光以就誠兮邀 殊恩之渥
至胡白雲之日望兮溘少微其夜際慮司馬之推腸兮抱
終天而含懣滂雨酸然濯兵兮愁雲凄其掩旆春相杵而

輟歌于士發戈以實淚章始侍司馬於水衡子既領豹畧
於黔陽知泰山之可印子指北斗以相望嗟蒼昊之不吊
兮悵詰人之遽亡來徐毋而告奠兮歌楚夢以徬徨苟靈
光之弗歇兮監炙絮其來嘗

祭江太夫人文

惟靈虎林毓粹鶴夢載吉三德婉閑六行名率鏤彩發宿
敷芬月室仇美觀察瑩然雙玉爰淑蘋蘩恪脩棗栗蔚蔚
世胄娉娉詰匹祥誕中丞鳳芝龍木霄霏振采華樞豐騰
比戀崔輿歸弄萊服霞帔金盤承懽侍膝夜郎不度帝
成王節敬授中丞偏沅特設武鄉七檣戶牖六出蠶茲通

寇逐膏介鑽露布遙聞 天顏喜溢駿結 既紀龍誥且錫
胡為夫人遽爾拜月邊徽鬱黯將士慘慄 矧在中丞曷已
駸裂章於中丞締交有日又聆芳徽金相玉質昔壽萬年
不愧拙筆茲介大耋擬頌隆邳今則已矣心神愴怵陳誅
告奠秋風蕭瑟庶幾鶴馭翩翩來格

祭許淑人文

名賢應世倪天配倫道存伉儷教則維均猗與淑人茂誕
閨珍清漢委和貴阜疑神曰歸慶闕觀察作嬪壺儀丕樹
內范克敦言瑜行瑾色慙心恂蘋蘩以潔蒹蘭是紉觀察
矯翮射筮金門初結銅章兩燁琴聲比膺持簡為耳目臣

名高補袞望赫埋輪疊轉潘臬氣槩嶙峋完懿具良幃政
聿新 天子葵之程第頌宣和九有訓鳳毛郁郁共期曼
壽允稱三德溘焉一夕遽邁百六蓮推並頭魚垂比目吊
鶴書鴉哀狷夜嘯章於觀察誼聯仕牘近入黔中耳屬懿
淑寶婺沉輝蕙帷霄覆爰薦生芻用彰如玉

入黔祭吳楚黔中水陸神文

子章欽承 明命填拊貴筮自吉徂黔繇水登陸方舟泝
泝良馬逐逐乘風江湖驅車林麓惟神默佑疑此景福

入黔告祖廟文

仰惟列祖德厚流深予小子章夙廁 朝簪晉陟中丞出

拊于黔州屬荆梁野分井參播酋不諱嘯號山林何以九
攻何以七擒匪革其面將攻其心穆下告廟祖考如臨惟
俾飛鸞懷我好音

祭楊義叔觀察文

嗟嗟義叔遽止於此耶子與義叔幼業鄭圃歲在丁巳同
入橫序君年十一子十有五君嘗庚庚子亦嗶嗶里人眎
之身龍召虎辛未之春子先君舉君起甲戌後先齊武君
令東官子為潮守始以陵兒委禽相府蘿附於松邾偶於
魯君不予彼夙昔之故 天子召君主柱下史蹇蹇匪躬
皇皇靡盬出臬入藩為霖作雨劬勩拮据備嘗辛苦交州

之紅黎莫交惡既延與西閉關以却君入蒼梧曲為經略
 地歸於黎祀不斬莫允真韜戈百越罷析伏波銅柱萊公
 鑠鑰府江小醜躡躅林薄逆我顏行肆彼毒蠱君奮厥武
 須搖式廓遺械如草流膏成登捷書馳奏功埒衛霍亡
 何夜郎遠焉跳躍庭推監軍於貴之陽君從八柱入賀
 建章帝曰臣哉無以易楊西粵著勸東里義方矧於撫
 臣維梓與桑君來八番賊執方張提劍於陳叩智於囊作
 使土夷勦亦疆場殄瘡飲血撩虎牧狼一月三捷逆酋大
 創鬪脫不守機槍匿光兵環三省君功亡二督臣叙功羨
 君獨歸失之武人得之文吏縛賊獻俘歸來飲至又在戎

行形頗顛顛篤念慈幃教誨請侍予木君阻遂為君題
 銓部覆議其實國器斲予之告病渝即出得旨言歸丘
 園是責日羣戚友山水遊戲五老而六三顧而四今春書
 來忽云病瘁予頻馳問輒獲羊字中實傍徨日夕憂悸命
 兒筮之大白為崇亡何訃至倏焉捐弃嗚呼義叔其何以
 死播功已序主恩不次胡不少延侍數之異太師相業
 待君而熾胡不少延為家昭嗣君才距躍萬舉萬決胡不
 少延為國賢顯君文秀粹縱橫恣肆胡不少延為國
 掌記予淚甚澁今為君涕予哀義叔不於其細若夫慈母
 在堂屬之佳弟君有兒女比於唐棣章即不敏既援既繫

擁衛愛護其敢或替綏交有錄予爲君評平播有碑予爲
君營府江攸馘旣宣于 廷身後之卹當有殊旌君雖亡
矣不亡者名盡瘁而死亡并孔明九原可作何忝文貞予
所恨者予負義叔義叔之病病繇貴筑貴筑之來其來爲
僕勤比勞新苦猶茹蓼未及畫麟柰何賦鵬君今已矣僕
猶鹿鹿聞君之訃如何不哭嗟嗟義叔縱不予督予能不
蹙蹙邪予能不蹙蹙邪

征皮林誓師禡牙文

么麼皮林介於邊徼旄頭麈尾毒搖驚我鴻鴈埒於
鳴梟 王命出征劬彼有苗惟神威靈上拂漢霄止則虎

幄行則鷄翹爰虔玄醴印告赤幟神兮默祐助我騾姚

征皮林告關廟文

頃禱播酋實仗我侯不謂皮林大國爲讐 王命春蒐章
也執劉爰礪戈矛爰整貔貅籍神壯猶鋤此螟蝨卷長狄
喉飲月氏頭下解氓愁上紓 主憂獲醜青丘敢忘神謀

五日謝雨文

屬者恒暘爲灾四野如赭民幾不粒子章躬率官吏師生
耆老人等齋袂徒步控告於我明神惟神之靈閱民之不
辜若響若答晦夕大雨端三日又大雨旣霑旣足嘉種入
土民不咨嗟惟神之休空中若有物焉皆雨而下土民曰

卷之十三
十五
漫羅子又曰羅羅子或曰桂子或曰菩提子考之於志隆慶壬申曾雨於城是歲大稔士民競拾僉曰瑞徵是用潔茲牲醴少伸謝虔第旱極之雨如人久病小瘉越時弗繼土且復焦圻更祈益揚神功裨甘露益霖霖民用有秋子章等幸免於盪神亦獲有報事

偏橋開河告河伯文

惟黔之山如彼田陌在在崔嵬壘壘不戰惟黔之水如彼金液流不容舳溪不盈尺年來寇旱路半兵革赤子磬懸驛舍柴瘠偏鎮之間民苦行役偏亦有河河中有石爲水之梗爲舟之厄石去其半舟亦可刺誰其司之司於河伯

積虔告神募工分擘惟神陰相毋令捍格石澹川流舟行溪關民困少紓敢忘神德

祭楊憲副龍河年丈文

層溪高龍其近也尺朱陳世起里旅共籍予與觀察幼共研席言臭如蘭情洽莫逆出試有司名滉仲伯談天曰衍雕龍曰奭庚午之秋南北共拔里人目之連城雙壁後先出守相期無斃君祖伯起家傳清白子派滎陽敬于二號君遷觀察弭節荆襄予繇七閩填枻貴陽夜郎憑險逢我顏行章也受斧叩君智囊君爲借箸裨我助勦亡何君疾竟逐西昌楚黔濶若參與商君才本軼君齡方將猶異

勿樂載飛載翔亡何赴來云遊帝鄉君與義叔並亢于揚
一月之間兩驥偕亡俱我肉戚如何不傷嗟嗟君幸有子
襲裘紹芳四世三公君家之常爰歌楚些以薦豆觴魂寢
巨室何存何喪

開塩井告山川祭文

子章昔在蜀中親歷塩井刻爲圖說以告來許比拊黔中
夜郎匪茹淮南之塩入楚境滇蜀塩客縮武絕跡黔中
塩乏有如玉屑每斤之直幾至百錢比播平而賈復入視
昔價日增矣章竊惟五行之水潤下作鹹禹貢之文青州
貢塩北海南海出於海滇南西川出於井河東出於池河

北出於地永康出於崖民生日用不可少缺以故字內無
處不有寧獨黔中而靳於斯乃取蜀故刻募蜀精匠三人
入黔相其陰陽俱云地脉流膏可穿井出塩茲者卜吉備
牲昭告于神惟神孕靈富醞不愛其寶陰灑神液早賜其
鹵俾黔與蜀滇齊美與海池分功民獲嘉利神亦永享祀
於無疆

祭鍾礪山方伯年丈文

惟公鍾離名家南粵北斗學淹九丘腹藏二酉在野曰麟
爲廟之簋珠海鹿鳴瓊林龍吼出宰陽朔百里墨綬匪石
爲心寒松作友度支司計武陵出守庭有懸魚夕無吠狗

掌醢於閩標比瓊玖持憲於滇茂彼狼莠遂晉維藩作丞
之右爲兆人人爲衆父父亡何一疾公遽俶裝曰歸曰歸
扶胥之傍甫出昆明至止貴陽公疾大漸遂卽於冥子章
於公同藉弟兄爲易曾嘗爲治黃腸子不在側有侄相將
魂乎歸與返於五羊嗚呼大塊勞我寤亦黃梁母謂牂柯
便是鬼方母謂碧鷄非吾故鄉萬形有弊孰彭孰殤人寢
巨室何在何亡

祭大學士趙文懿公老師文

嗚呼我師學宗聖賢不自標門樹幟而天下不能名其
學位都卿相不自握權怙寵而天下莫能趣其勢有高天

下之節三綱五常皆所扶掖而不知植於其手有容天下
之量賢愚細大皆所并包而不知囿於其度有相天下之
功四夷百蠻皆所安棲而不知救於其謀斯大雅也亦大
忠也惟主上知之任日久而不疑毀日至而不搖惟

天知之相幾十年壽幾八袞而福日凝子孫幾三十人而
裔日昌及門之士不肖輩或知之而惡得無一誅以暴揚
天與主上之知吾師者以定萬世之論以盡在三之義
金華之學宋有呂氏元有金氏吾師承之居家則與徐奉
常胡觀察居官則與鄧宗伯鄒給諫講明正學力行古道
而自名其故所讀書處曰六虛則學孔之願也繇鼎甲而

官諭繇少宰而元相名執赫奕若火猛風疾而師居之如
執朽去之若捐重一椽一瓦仍先世之舊而不易其故一子
一弟聽銓部之察而不撓其法則赤烏之忠也師由講讀
而外補而大寮實以翰林綱常一疏師名居首官起居注
促鄒進士疏於省中而毫無顧忌則羅彞正同傳矣島奴
入寇封貢戰守甲可乙否而獨責備於師頃 東朝未正
主上深衷淵謨臣下莫窺而獨責備於師師亦怡然受之
曰予待罪宰相不予責而誰責也絕無幾微懟忿語則呂
文穆同量矣自爰立至今西定寧夏東完高麗西南討夜
郎殲皮林邈世之勲定傾之筭如探九淵其際無有則李

鄴侯陸敬輿同功矣或言師所未盡如意者乞骸之疏至
七十上竟未獲 俞旨而奔賓客於長安 前星之耀羽
翼功多竟未獲躬逢而瞻 甲觀於夜臺嗚呼大臣心在
帝室寧必首丘功在 後王寧必身親師又何憾於斯邪
子章已巳辛未兩出師門三十年來道義相鎮骨肉相眎
子章不敢墮惡趣以負負門墻師亦時時發藥石以偕之
大道今則已矣井魚誰與語大夏蟲誰與語寒歎啓寘聞
誰與語至德哉株守羅施遙瞻箕尾為位而哭有涕如屑
尋平生於響像寄哀痛於誄詞蘭陰寂寂澌水悠悠敬歌
楚此為寫予愁

祭母舅公劉柳洲文

人亦有言繼母之賢如星在晨叔世尤鮮聖若重華賢如子騫遭迨不辰骨肉秦燕章獨何幸母氏聖善卽母之聖亦舅之雋嗟嗟我舅與母同產本出華腴相戒泱泱謂甥卽貴其守如洗甥勤於國汝勤於畎舅承母訓砥礪閔免風煙爲鄰松桂爲儷七尺爲巨萬物爲細武姥磷磷柳洲芮芮如何一夢遠焉長逝母哭於室章哭於夷微獨舅傷實爲母涕嗣子敬承孫枝更植克繩祖武能維世系舅靈如慧何存何弊

祭李仁宇都督

維靈蚡冒托跡羽林應期世延帶礪勇搏熊羆衡嶽如峙洞庭爲池詩書早說禮樂咸宜將推鷹揚人望執夷帝命蕩播柱銅西陸三苗汛掃九股分披靖堪竝駕牧可同帷旋推善後夜郎載移霜雪漸減春風滿吹營收烽燧堊重畬菑保障稱昔干城在茲投戈講藝橫槊賦詩陰深細柳酒溢金卮數擬長算天胡靳斯鵬鳴于屋焚及于芝四塞停杵三軍罷炊晴空鶴唳幽谷猿悲萬里渺矣孤魂何之嗚呼握符如虎視死若飴獨憂社稷寧計妻兒含咲易箒託靈向箕驃姚功峻李廣數竒子章曩督蜀學夙侍風儀別來一紀公守其雌逆龍匪茹授公義旗虎旅正肅

營星告墮既勤於國復死於綏燕然勒石伏波累屍以公方之千古陸離人寢三巴魂返九嶷遣官代奠涕落漣漣嗚呼圖麟有閣墮淚有碑公靈如在鑒於我辭

祭來瞿唐太史

吁嗟矣鮮蠶叢之精魚復之雋童也狗脊疾而狂易夢登巫巘或之帝所九天九地如車軫轉疾瘡遊洋耀於光明出於渙忽歲在壬子寇西川士厥名始顯人皆趨羶公獨辭金欸欸惻惻御史壯之清節可風大書詔扁連上公車婁躋南宮筮之往蹇公曰高堂父兮何依母氏聖善決計題引不以甘旨易彼冠冕願學孔氏仁義為樊名節為鍵

菴築快活榻字九喜脫然世胃已之求溪乃悟錯綜乃譯象彖大放厥辭巨及渾儀細逮惴惴三十餘年盡蠲塵全一意注譔章督蜀學校文胸臆始梃琰琬半夜譚心二簋論道如對顏冉別去廿載來撫貴陽公仍善飯易注已就為殷六瑚為夏四璉章疏尉薦天子曰嘻起公於畎畝備顧問官為待詔職在翰苑公疏臣老不堪馳驅不勝仰俛帝俞公請仍給月俸用旌恬憺我明徵君餘干如斗江門如峴以公眎之鼎足而三天球無塚亡何小疾泰山其頽哲人其殄斯文將喪吾道益孤有涕如泣吁嗟矣鮮蟠龍屈曲金鳳塞產遣官告奠魂寢巨室何增何減

開黃平古磔河告水神文

粵惟古磔源出夷莽流入黃平溪谷漸廣惟石粼粼馳波
蕩蕩中有翁樞巖突嶒嶒 神龍宅之於茲偃仰四千餘
年淪在播壤不舟不楫靡樞靡漿夜郎旣威黃平益敞漢
夷輻湊冠蓋來徃士畏叱馭人嘆望洋章也奉 命忝爲
之長洞開靜黎以祁豐穰河鑿諸葛以舒滄泱維茲磔河
尚未分港敬消剛日疏鑿滌盪人力有限 神工是仗敢
告馮夷力驅罔雨萬年 廟食世世蜡饗

祭王侍郎見峯年伯

維王之先子希之後太原托根琅邪衍秀迨于我 明新

城益茂祥發罔卿黃鍾太簇薦生司農爲世名流言無枝
葉行有區囿江左之導三槐之祐玄玉處璞綠耳在廐蜚
聲禁闥鸚鵡是造出撫荆楚湘漢丕覆入參 國計漸秉
鈞軸功紀太常名溢宇宙乃謝軒冕乃躬鋤耨石閭可枕
渤海爲漱盡發典墳子姓薪槁荀氏八龍燕山五寶麟趾
麟定實種實衰滿砌芝蘭百年鶉鷄一疾弗延千里來赴
豈厭塵坐歸于靈鷲柳騎箕尾光于列宿守臣疏聞 天
子震驚禮官議祭行人治瑩司馬在蜀涕泗惇惇章於司
馬義埒弟兄家喪著祭 朝失老更哭於龍番唁於錦城
爰寫楚些爰羞湘醑典刑如在秦岱吟岳

祭趙寧字尚書文

惟公源出天水派衍造父既遷渝州克昌天府比公而熾
碩人侯侯玉壘精凝銅梁秀吐舜趨禹步夏瑚周簋爲兆
人人爲衆父父始躍南宮出宰東魯秋霜其嚴冬日可照
已列西臺聲震持斧一琴一鶴閱道是武心傳耳傳昌甫
爲矩敷歷藩臬扶胥之澣百越攸救五嶺安堵填拊八閩
威靈海嶼巡視關陝驅逐醜虜狂璫虐荆荆人哀苦天
子命公來撫三楚去彼乳虎奠我編戶荆人曰嘻無公何
怙亡何狂宗如黠如偷呂之僞橫加楚掖蝟起鴟張公
罹於厄昔正德季宸濠奮戰孫許死義英英赫赫公今三

之忠魂義魄 天子震怒鯨斬鼠磔公讎已報公忠愈白
晉秩議謚爛焉史冊子章事公於粵簿書爲役繼撫於黔
輔車是藉聞公之訃有淚如液涕泣而疏聞於魏闕嗚
呼伏波有言志在馬革死得其所寧必易箚江漢滔滔公
心則赤日月悠悠公血則碧爲歌楚些尉公莫莫

祭夏仁吾侍郎年兄文

章於我公竊幸同籍憶昔辛未同籍四百三十餘年強半
易箚徘徊仕涂參商疆場誰能合劍促膝朝夕章曩事公
吳越同役章忝司儲公實司驛內徹腹腸外聯第宅流連
湖山信信昔昔已而去浙同爲方伯公得豫章章之楚澤

共申浙盟共戒晉鼯母為恣恣母為赫赫既同入 觀免
于僇屏分袂而別涕落如液相期歸來南阡西陌亡何承
詔填柩于藩公仍廬阜我得龍番維時送龍有徒實繁
公為我畫短紙長篇尉我以詞贈我以韉既而賊俘公喜
溢顏書來相誠字長元元豫章吏氓秋肅春溫令行江渚
澤浹海昏亡何一疾遂至綿延即臥床第猶叩 帝闈首
議稅監毋重民寃繼為伏賢母老丘園言不及美直也如
弦方之古哲史魚弟昂章羈黔域遙瞻楚氣聞公之赴哭
于寢門公有令名泰山言言公有嗣子天策焯焯魂歸桐
汭何喪何存

乙巳征苗禡牙文

山苗仲夷雲擾道路赤白之囊紛員如雨萬不獲已爰整
其賦匪曰喜功異救疆圉惟神相之盡掃厥靈殲渠折首
永清國步謹告

告關廟文

子章留滯鬼國春秋者七凡有征討惟王是質今日之舉
彼實狂獍不有湯沐孰去蟣蝨朔夕見夢諭我元吉惟王
陰隲未俾盜謚謹告

祭曾禹門孝廉文

嗟嗟翼雲何以死邪人亦有言桃李早實來年必衰豔豔

易落華壁易碎顏大陋巷賈亡長沙此言早成者之脆也
翼雲十歲讀古文十四游泮十七入鄉闈備中式卷何慧
之早如人言當易落易碎而年至六十氣雄萬夫人又有
言大方無隅大器晚成長松千尺孕爲琥珀靈龜千歲遊
於蓮葉呂望八十爲帝者師孫弘六十始對公車此言晚
成者之堅也翼雲躋於場屋四十餘年年五十六始博一
第何成之莫如人言當如望如弘而花甲方周遂之帝所
嗟嗟翼雲早慧者脆而君不死晚成者堅而君竟死吾將
何以定君之壽歿邪或言翼雲誠樸之質篤實之學上無
愧古人下無忝爾祖老子所云不失其所者久死而不亡
者壽其翼雲之謂邪審若是翼雲可以死矣予縻半黔未
歸田里君病不知君舍未視幼孫呱呱行將疑疑卵而翼
之在于父子嗟嗟翼雲可以死矣嗚呼嗚呼

祭副使楊恭巖

惟公源出伯僑祥開弘農水遷潑水嶽降貴峯關西芳冑
安平遺蹤爲國子師大呂黃鍾爲二千石昆明楚雄白鹿
秋肅赤子春融井鬼殊野漢楚同風豫州叔節蜀郡文翁
天子葵之觀察馬龍兩江澄浪千里祈衝無何憂去高
臥黔中北山之北東山之東咳唾軒冕剪拂菊松士如羣
蟻公若飛鴻天不憖遺百六是逢祈酌周斗竟輟秦春哲

人其萎我涕無從嗚呼公畏四知位厄上公公有三喜足
捷奔虹清白之遺蘭芳桂叢公騎箕尾遊於崆峒百年鼎
鼎誰朽誰穠

鑄錢告鑪神文

丙午

三金竝用泉居其一黔域於西萬山率律舟輿阻僿苗夷
紛出百慮千計計在養卒而餉不繼束手亡術瞻此鑄錢
載在令甲乃設泉官乃營泉室赤銅可市爐石可鬻敬庇
牲醴穆卜吉日敢告于神匡困濟乏一祈肉好毋令缺裂
一祈工匠毋令越軼泉貨流通糗精充足旣飽貌貅何憂
狂獮太平有日敢忘神烈謹告

